

Kayëta ixinëm ir Šaŋ in

Lilaya in

Ar yëgwëk kayëta ijo an wacaya ko «Axarëk an». Okëreceŋ oñanar od bax fënënd kayëta ijo ok rek mëne Šaŋ, parëxanda ir Yesu Kërisët exo axarëk ajo. Gayikako bend kë sëyalind beŋ awëndër wëndërek gë bend gër kayëta iyanar ir Šaŋ beŋ. Ata gër osëy'ali olo er ex: ediya ed gër däl do gër aŋana el do gë ekwëyëta ed bër kë sëyalind bend fitarëk gë osëy'ali oyanar el. Er ex gër akayëta in:

End ar yëgwëk kayëta ijo eŋ: 1-3.

End apela and aŋana eŋ: 4-6.

End ekwëyëta ed bësëy'ali bënëgwëš eŋ: 7-11.

ʔapela ʔapelatar ʔaŋ: 12-13.

Ecëmar el

1 ¹ Wëno axarëk an këŋun yëgwënëlınd wëj Asoxari ar sana këŋo Kaxanu an, do gë obaš oreŋ ol. Wëno enim ðan këmun, ado dek bër nangëk däl bën ahan ðan kënun bëte, ax gi ex na wëno fo. ² Ahan ðan këmun gayik däl in gër owëkw orebi ex do din kë ʔayi. ³ Faba Kaxanu, gë Yesu Kërisët, Asëñiŋ, yëlëlenëbo oyekax ol, gë axayënan in do gë obetak ol ene dıyaxënënde gër däl do gër aŋana.

End däl eŋ do gë end aŋana eŋ

⁴ Mbaŋ nëngan ke ga sëk këmëni obaš oreŋ orëmar ga këni liyand gër däl, ang rek apela and yël këbo Faba Kaxanu ak. ⁵ Do gërëgako wëj Asoxari ajo, axara xara këmi: ʔalërendëlebo andëbi rebi aŋ. End këmi yëgwënëlınd eŋo awël wël këne elod gër yanar, ax gi ex na apela angašax. ⁶ Aŋana aŋ ex edi ed er kë rend ʔapela band Kaxanu el. Awa apela aŋo ʔapëk ene tëfe gër aniyan andëbi ang wël këne elod gër yanar ak.

⁷ Enimin, bëyifa bërãnjëm šanayawëk gër ngwën do këni rend mëne *Kërisët axo ʔow bana hi ko ala. Ata bën ex de bëyifa bën, bërangoyëra and Yesu Kërisët bën. ⁸ Titinayin gër aniyan andewën, kërex capër na andiyen andëbi aŋ. ʔarikan kemënayin en cotaxën acosa anjekax aŋ.

⁹ Ar kë ʔašënd yo bendey' becëxe, axo ʔayi ex na gë end sëy'ali këbo Kërisët eŋ fo. Ala ajo axo gi ex na ar Kaxanu. ʔarikan ar

xwëtayak osëyali olo an, abar bar këni gë Faba Kaxanu do gë Asëñiŵ. ¹⁰ Angëmëne ala exo yeli gër ndewën do axo mëlali ex na osëyali olo, këreno kacaf na gër iciŵ indewën, këreno cëmaf na dëŋ! ¹¹ Gayikwa ar këŋo šëma an anëka šoma këŋo gër bandixa bañëŋanax bandexëm.

ʼBepelatar beŋ

¹² Ado ga yëmbëk bebër yëgwënili domun bën, axe ñandi bana mun pelëra gë oñëgw. ʼBarikan ayar këme yarënd mun nëngali mun pelërax wëno dëŋ, do ebo nëngandëraxën biyi dek.

¹³ Obaš or imaÿe itoxari indey ind sana këŋo Kaxanu ol ašëma këni šëmand.